

半塘定稿

張大題



臨桂王鵬運先生著

半塘定稿

京華印書館刊

半塘僧驚小象



贊曰

不死於病恐將死於讒慝之口僧驚何幸歸正丘
首達不得志窮無以自存又甚哉流落而不偶於
戲啼矣其嚴冷之氣不可傳而章疏又不欲於自
傳勤以生平劬嗜所謂長短句者遙託諸侍郎之
老友大運有限傳者爲壽謂僧驚好名侍郎曰否
乙巳夏南甯鍾德祥識

半塘填詞定稿敍目

卷一

乙稿袖墨集令慢七首……………一

蟲秋集令慢六首……………五

丙稿味梨集令慢二十二首……………八

丁稿驚翁集令慢十九首……………一八

戊稿蝸知集令慢十六首……………二七

卷二

己稿校夢龕集令慢二十四首……………三五

庚稿庚子秋詞令十七首……………四五

春蟄吟慢十三首……………五二

辛稿南潛集令慢十五首……………五九

凡二卷七稿九集一百三十有九首

半塘詞嘗刻於京師爲丙丁戊三集今刻於廣州者乃君裒其前後七稿刪汰幾半僅存百許首自定本也予校讎旣竣而序之曰同在人海之中相遭而爲友相友而又相知而忽焉以逝者莫不以爲人事之至悲況乎夙以文字相切劘共歷患難及其別離商訂舊業言笑若親而甫接其書遽聞其死者此予所由摧傷感歎而不能自己也始予在汴梁納交君相得也已而從學爲詞愈益親及庚子之變歐聯隊入京城居人或驚散予

與同年劉君伯崇就君以居三人者痛世運之淩夷患氣之非一日致則發憤叫呼相對太息既不得他往乃約爲詞課拈題刻燭于喁唱酬日爲之無閒一藝成賞奇攻瑕不隱不阿談諧閒作心神灑然若忘其在顛沛兀陲中而以爲友朋文字之至樂也比年君客揚州予來粵東蹤迹乖阻書問時月相往還每有所作必以寄示予謂君詞於回腸蕩氣中仍不掩其獨往獨來之概君乃大以爲知言今年春郵寄小象屬摹卷端謂令人他日得見此老鬚眉其風趣如此方冀易一二歲予解組北去從君襄羊山水閒各出所作相質證此樂正未有艾未幾而君訃至矣悲夫悲夫君天性和易而多憂戚若別有不堪者旣任京秩久而得御史抗疏言事直聲震內外然卒以不得志去位其遇厄窮其才未竟厥施故鬱伊不聊之

概一於詞陶寫之君詞導源碧山復歷稼軒夢窗以還清真之渾化與周止庵氏說契若鍼芥其必名於後固無俟予之贅言而零縑遺墨燦然如新逝者不可復作抑將何以爲懷耶他日伯崇見是編其感喟又當何如耶歸安朱祖謀

頃年老僕自謫所歸寓家羊石於是老友古微侍郎督學來此蓋自京師別去且十年不翅矣一昨甫相見侍郎則驟語僕曰給諫王幼霞今客死蘇州幸得其遺詞皆手定將爲之刊印以行僕聞之驚悲與侍郎同心哀之遂請其集以歸閱焉皆曩昔臺閣餘暇時朋舊文酒宴集搭拍應副若不越乎流連光景之情文其爲僕所親見吮毫伸紙者泰半也今再讀其遺詞幼眇而沈鬱義隱而指遠臍臆而若有不可於名言蓋斯人胸中別

有事在而榮然不能行其志也與僕同脫幼霞能稍濡忍事或未可知乃
決然侘傺以去寧流落至死一瞑而不視豈謂非慷慨扼腕獨立不屑之
士也歟僕今既老醜閒廢幼霞復彫喪人閒世尙何者堪把玩留戀況浮
漚文字之閒乎乃吾侍郎獨不閒故舊死生之故爲幼霞謀遺集之傳而
繇邈乎其情僕爲之悵焉動一念矣侍郎曰日吾且開雕然則非君序之
不可於是乎言之而益增吾悲光緒甲辰冬十月南甯鍾德祥

半塘定稿卷一

臨桂王鵬運佑遐

袖墨集 丙戌至己丑

掃花游

豐臺菊花零落同槐廬粹父泥飲叢祠倚此索和

彎環十八。是丹鳳城西。賣花邨路。舊游憶否。又蒼煙偷換。穠春歌舞。好約
來遲。一片秋聲在樹。自凝佇。歎著意訪秋。秋轉無據。醺酒重弔古。記往
日詞人。醉香深塢。遠山翠縷。尙依稀認得。那人眉嫵。倦倚西風。誤卻紅牙
舊譜。喚歸去。聽叢祠暮天鐘鼓。

毛西河姬人曼殊
豐臺張氏女也

摸魚子 瑟軒前輩閨近作拜新月詞有句云釣竿百尺綴珊瑚不

羨麒麟閣上圖。欲取鰲魚斫作膾。問君何處覓塔沾蓋驢。
括詞中語也。倚此奉答。

鎖無聊。一尊相屬。罪言君試聽取。管城食肉都無相。妄意鳳脩鱗脯。君且
住。問鯖合。侯家勝得齏鹽否。書空自語。歎臣朔常飢。將軍負腹。奇氣向誰
吐。鱗閣上。往事不堪細數。算來圖畫難據。高平博陸皆人傑。屬國爾來
何許。休起舞。便燕領。權奇無覓候封處。歌予和汝。縱挈得金鼈。覺髦未掃。
莫慰此情苦。

滿庭芳 簪鏡夜坐。忽聞清歌墜。懷根觸渺。予懷也。

風露高寒。蛩螢怨抑。夜闌人倚鐙篝。暗塵驚落。何處發清謳。已是潘郎老
去。青衫在。鬢減花羞。十年恨。無端棖觸。腸斷舊風流。風流彈指處。畫中

人遠。夢裏春柔。料記曲當時。紅豆還留。倩取窺簾淡月。悲懽事一例全句。
霜華重。丁丁漏水。銀箭咽潛蚪。

秋宵吟 霧雨釀寒秋光向盡和鶴公

冷雲低。敗葉委。又到秋光婪尾。東園畔。記醉綠酬紅。餞春曾幾。思纏繇。意
旖旎。撩亂愁絲難理。西風悄。又霧雨冥迷。釀寒如此。賴有黃花。共晚節。
傲霜未已。故人書斷。海客談空。何物令公喜。安得滄江裏。一葉凌波。深入
萬葦。泝空明。弄笛船唇。歌闌明月正在水。

金縷曲 霜露既至雲物皆秋獨絃哀歌用扞予懷詞成以示巢隱
曰此秋聲也爲之擊節

寂寞閒門閉。又天涯、歲華如此。旅懷孤寄。蛇燕嬌鶯前日事。依舊空塔絡

緯更著甚。管絃清脆。薜荔叢深猿狖嘯。料靈均應恨歌山鬼。還禁得幾憔悴。海山煙樹蒼茫裏。自成連。刺船歸後。果移情未。白眼看天星與月。但見樓臺彈指。問高處。闌干誰倚。慢遣鈿箏移玉柱。鑄相思。枉費黃金淚。聽嘹亮。鴈聲起。

青山濕徧 八月三日譙君生朝也歲月不居人琴俱往納蘭容若

往製此調音節淒惋金梁外史龍壁山人皆擬之傷心
人同此懷抱矣

中秋近也。年時棖觸。雙笑行觴。記得木樨香裏。倚青陰。特換明妝。更喁喁。吉語祝蘭房。願年年。花好人同健。醉花陰。不羨鴛鴦。誰信皋橋賃廡。飄零天壤王郎。任是他生能卜也。難禁得。此際神傷。二十三年斷夢。霜侵鬢

誰念無腸。看依然、兒女拜成行。只不堪、衰草殘陽外。醉棠梨、淚血沾裳。明月無端弓勢。宵來空照流黃。

臨江仙 己丑除夕

爆竹聲中催改歲。年年此夕殊鄉。天涯兄弟各相望。幾時歸去。談笑醉春觴。已是向平昏嫁了。名山願好誰償。休從鏡聽卜行藏。春花秋月。流轉任風光。

蟲秋集 庚寅至癸巳

太常引

畫闌秋氣與雲平。病起怯衣輕。吟思底、淒清。聽依約、蛩聲鴈聲。窸窣老
子。十圍便腹。空洞儘容卿。青眼幾時橫。看山色、新來瘦生。

卜算子

盼到月輪圓。夜夜期三五。誰信清光欲滿時。偏被纖雲妒。
七十二鴛鴦。交頸花閒住。誰信成雙作對飛。賸遺孤鸞舞。

長亭怨慢 寒夜飲水芝支館用壁上龍壁山人詞韻案省旃和

漫商略。愁長宵短。滿目風塵。素襟誰浣。歲晚冰霜。中年絲竹。意何限。願花
長好。爭信我。風懷減。許事不須知。看月與清尊俱滿。依黯。認酒痕猶是。
早是酒人星散。清寒對影。漫贏得笑人蘭晚。儘依依。照座銀荷。也羞對。年
時心眼。倩簾幙橫枝。長笛夜寒相伴。

采桑子

闌干糸曲閒凝佇。日影東廊。月影西廊。一霎寒溫值底忙。小園貯得春

多少。花要生香。葉要生香。那禁東風柳絮狂。

水龍吟

平生嗜睡成癖。讀天籟集。睡詞深有契於予懷者。戲用原

韻以誌賞心。

舉頭十丈塵飛。人閒何許埋愁地。頽然一笑。玉山自倒。春生夢寐。我已相忘。蕉陰覆鹿。槐根封蟻。歎無情世故。倉皇逐熱。問誰識。於中味。漫說朝來拄笏。最宜人。西山晴翠。何如一枕。忘機息影。黑甜鄉裏。萬事悠悠。百年鼎鼎。付之酣睡。待黃鸝三請。窺園乘興。倩花扶起。

念奴嬌

登陽臺山絕頂望明陵

登臨縱目。對川原繡錯。如接襟袖。指點十三陵樹影。天壽低迷如阜。一霎滄桑。四山風雨。王氣銷沈久。濤生金粟。老松疑作龍吼。惟有沙草微茫。

白狼終古。滾滾邊牆走。野老也知人世換。尙說山靈呵守。平楚蒼涼。亂雲合沓。欲酌無多酒。出山回望。夕陽猶戀高岫。

味梨集 甲午乙未

滿江紅 送安曉峯侍御謫戍軍臺

荷到長戈。已禦盡、九關魑魅。尙記得、悲歌請劍。更闌相視。慘淡烽煙邊塞月。蹉跎冰雪孤臣淚。算名成、終竟負初心。如何是。天難問。憂無已。眞御史。奇男子。只我懷抑塞。媿君欲死。寵辱自關天下計。榮枯休論人間世。願無忘、珍惜百年身。君行矣。

八聲甘州 送伯愚都護之任烏里雅蘇臺

是男兒萬里慣長征。臨歧漫淒然。只榆關東去。沙蟲猿鶴。莽莽烽煙。試問